

«Զգեցէք որ մանուկները ինծի գան, արգելք մի ըլլաք անոնց,
որովհետեւ այդպիսիներուն է Աստուծոյ արքայութիւնը» Մարկոս 10.14:

Հայաստանեայց Եկեղեցւոյ
Սուրբ Յակոբ
Կիրակնօրեայ Դպրոցի Ամսաթերթ

Մ ԱՇՏՈՑԻ

Մ ԱՐՁԱԳԱՆԳ

www.sourphagop.org/mashdots

ԺԸ տարի

2011

Տարեկան Բացարիկ

Բովանդակություն

Խօսք Հովիւի եւ Հոգաբարձութեան	Էջ 3
Նկարներ՝ Կիրակնօրեայի 2010-2011 տարեշրջանէն	Էջ 4
Մեր Խօսքը՝	Էջ 7
Հակիրճ Տեղեկութիւններ 2010-2011 Տարեշրջանի Մասին	Էջ 10
Ձեռնարկներ եւ Արտադասարանային Աշխատանքներ Ժամանակագրական Շարքով	Էջ 12
Աշակերտական Ներկայութեան Տախտակներ	Էջ 13
Նկարներ՝ Կիրակնօրեայի 2010-2011 տարեշրջանէն	Էջ 14



ՄՈՒՐԲ ՁԱԿՈՐ ԱՌԱՋ. ՄԱՅՐ Մ ԿԵՂԵՑԻ

Église Arménienne Sourp Hagop Armenian Church

Երկուշաբթի, 9 Մայիս 2011

Մոնթրէալ

Թիւ 20/10-11

**Սիրելի տնօրէնութիւն,
ուսուցչական կազմ,
ծնողներ եւ աշակերտ-աշակերտուհիներ,**

Կիլիկիոյ Վեհափառ Հայրապետը՝ ՆՍՕՏՏ Արամ Ա. Կաթողիկոս իր ուղեցուցիչ հռչակագիրներուն վրայ՝ յարկ մը եւս բարձրացուց եւ 2011-ը Հայ Մանուկի Տարի կոչեց:

Վեհափառ Հայրապետը սփիւռքացեալ մեր ժողովուրդի զաւակները հրաւիրեց, որ յատուկ սեւեռումով մը անդրադառնան հայ մանուկի արժէքին:

Մանուկները ժողովուրդի մը ապագան են: Հայ մանուկներն ալ՝ հայ ժողովուրդի ապագան են: Հետեւաբար, պատասխանատու դաստիարակութեամբ գանոնք պէտք է կրթել: Այսինքն՝ կրթել այնպէս՝ որ հայ մանուկները աճին երկնային ազատութիւնը շնչելով, զարգանան՝ սորվելով տեսնել բարին, գեղեցիկը եւ ազնիւը:

Մեր համայնքը իր կրթական հաստատութիւններէն Կիրակնօրեան հիմնելով՝ պատասխանատու դաստիարակութեան կարեւոր քայլ մը առած էր: Հարիւրաւոր մանուկներ այնտեղ Հայ Եկեղեցւոյ ոգիին մէջ աճեցան ու կ'աճին: Այն ոգին ուղեղի լուսցում չ'ուզեր, այլ կը պահանջէ յարգել անհատին զարգացումը՝ իբր քաղաքացի Աստուծոյ արքայութեան: Հայ Եկեղեցին Աստուծոյ արքայութեան մէկ համեստ նահանգն է. գայն շէնցնելու պարտքը ունինք իւրաքանչիւրս:

Սփիւռքի հայութիւնը իր ապագան շէնցնելու համար՝ ստիպողութեան առջեւ է նոր սերունդին քայլերը ի շարս այլ կենսական կառոյցներու, նաեւ դէպի Հայ Եկեղեցի առաջնորդելու: Կիրակնօրեան այդ նպատակին ծառայող ճամբայ է: Հայ մանուկը թող չօտարանայ Հայ Եկեղեցիէն, որովհետեւ անիկա մեր ինքնութեան անցեալն ու ներկան է: Հայ Եկեղեցիէն օտարացած սերունդը՝ պիտի օտարացած ըլլայ նոյն ատեն իր ինքնութեան անցեալէն ու ներկայէն:

Ի սրտէ կը գնահատենք մեր Կիրակնօրեային տնօրէն՝ պրն. Թորոս Պապիկեանը, ուսուցչական փոքրաթիւ, այլ նուիրեալ կազմը, նաեւ ծնողները՝ որոնք պարտականութեան խոր գիտակցութեամբ իրենց զաւակները Յիսուսաբոյր Ս. Յակոբեան օճախը կը բերեն: Իսկ մեր աշակերտ-աշակերտուհիներուն կը վստահեցնենք, որ Կիրակնօրեայէն իրենց սորվածները՝ իրենց ապագային մէջ լուսատու գեղեցիկ ջահեր պիտի ըլլան:

Հաւաքոյն մաղթանքով՝

ՀՈՎԻ ԵՒ ՀՈԳԱԲԱՐՁՈՒԹԻՒՆ

Ս. ՅԱԿՈՐ ԱՌԱՋՈՐԴԱՆԻՍ ՄԱՅՐ ԵԿԵՂԵՑՈՅ

ՆԿԱՐՆԵՐ ԿԻՐԱԿՆՕՐԵԱՅԻ 2010-11 ՏԱՐԵՇՐՁԱՆԷՆ



ՆԿԱՐՆԵՐ՝ ԿԻՐԱԿՆՈՐԵԱՅԻ 2010-11 ՏԱՐԵՇՐՁԱՆԷՆ



ՆԿԱՐՆԵՐ՝ ԿԻՐԱԿՆՕՐԵԱՅԻ 2010-11 ՏԱՐԵՇՐՉԱՆԷՆ



ՄԵՐ ԽՕՍՔԸ

Փառք կու տանք Աստուծոյ, որ այս տարի եւս կրցանք Կիրակնօրեայ Դպրոց ունենալ եւ աւարտել մեր 31-րդ տարեշրջանը: Այս տարի նաեւ 18-րդ տարեդարձն էր մեր ամսաթերթին՝ «Մաշտոցի Արձագանգ»ին եւ անցեալ Սուրբ Յակոբի տօնին օրը՝ Դեկտեմբեր 2010-ին տօնեցինք մեր կայքէջին՝ www.sourphagop.org-ին տասնամեակը:

«Ձգեցէք որ մանուկները ինծի գան, արգելք մի՛ ըլլաք անոնց, որովհետեւ այդպիսիներուն է Աստուծոյ արքայութիւնը»:

Յիսուս Քրիստոսի արտասանած խօսքերը, որոնք Հայց. Եկեղեցւոյ Կիրակնօրեայ Դպրոցներու նշանաբանն են, կը մասն հիմը մեր եկեղեցւոյ պայծառութեան: Այն եկեղեցիները որոնց մանուկները արգելքներ ունին երթալու Յիսուսի, դատապարտուած են պարպուելու: Յիսուսի այս խօսքերը պէտք է ըլլան հիմը Հայաստանեայց Եկեղեցւոյ մտապատկերին, մանաւանդ Հիւսիսային Ամերիկայի մէջ:

Հայ Մանուկի Տարի

Հայաստանեայց Եկեղեցւոյ Կիրակնօրեայ Դպրոցները հիմնուեցան Հայ մանուկներուն համար: Հետեւաբար, նախ եւ առաջ, Հայ Մանուկի տարին պէտք է ըլլայ Կիրակնօրեայ Դպրոցներու Տարին, եւ Վեհափառ հայրապետը իր Կոնդակին մէջ լայնօրէն անդրադարձաւ Կիրակնօրեայ Դպրոցներուն դերին, ուրկէ կը մէջբերենք Վեհափառ Հօր խօսքերը.

Հայ եկեղեցւոյ համար հայ մանուկին դաստիարակութիւնը՝ իր կրօնական թէ ազգային տարածքներով, կը շարունակէ մնալ առաջնահերթութիւն: Այս ծիրէն ներս, Մեծի Տանն Կիլիկիոյ Կաթողիկոսութիւնը իր հիմնած Կիրակնօրեայ վարժարաններուն ճամբով անցեալին բարերար դեր կատարած է ու կը շարունակէ կատարել վերանորոգ թափով: Անցեալ տարի 80-ամեակն էր Կիրակնօրեայ վարժարաններու հիմնադրութեան ու գործունէութեան: Այս առիթով, Մեր հրապարակած Հայրապետական Սրբատառ Կոնդակին մէջ ըսինք հետեւեալը.-

”Կիրակնօրեայ վարժարանները անցնող տարիներուն կրօնական դաստիարակութեան մարզէն ներս հսկայ գործ կատարեցին ընդհանրապէս Միջուրբի գաղութներէն ու մասնաւորաբար Մեծի Տանն Կիլիկիոյ Կաթողիկոսութեան թեմերէն ներս: Կիրակնօրեայ վարժարանները սովորական ու պատահական նախաձեռնութիւններ չեղան, այլ դարձան թեմերու վարչակազմակերպչական դրութենէն ներս կարելոր կառոյցներ՝ իրենց յատուկ կանոնադրութեամբ, ուսուցչական կազմով ու կրթական-դաստիարակչական ծրագրով: Մեր Սուրբ Աթոռին Հայրապետները ո չ

միայն քաջալերեցին Կիրակնօրեայ վարժարաններու գործունեութիւնը, այլ նաեւ Կիրակնօրեայ վարժարաններու Ընդհանուր Վարիչ Տնօրէնութիւն մը հաստատեցին Անթիլիասի Մայրավանքէն ներս, որպէսզի մօտէն հետեւին անոնց աշխատանքին:

Արդ, 80 տարիներու ընթացքին կատարուած նուիրեալ ծառայութեան ու ձեռք ձգուած իրագործումներուն դիմաց այսօր կոչուած ենք ո՛չ միայն արդարօրէն ուրախանալու, այլ նաեւ վերանորոգ յանձնառութեամբ շարունակելու նոր սերունդին կրօնա-բարոյական դաստիարակութեան այնքան հրամայական առաքելութիւնը: Այսօր շրջապատուած ենք համաշխարհայնացած աշխարհէն եկող այնպիսի հոսանքներով, որոնք ամէն օր կը խաթարեն մեր քրիստոնէական դիմագիծը, կ'ապականեն մեր ազգային ինքնութիւնը եւ կը մոլորեցնեն մեր զաւակները: Հետեւաբար, ռեւէ ժամանակէ աւելի այսօր մենք սուր կարիքը կը տեսնենք հոգեւոր ու բարոյական արժէքներով թրծելու մեր նոր սերունդին կեանքը: Ահա այս սրբազան առաքելութեան է լծուած Կիրակնօրեայ վարժարանը”:

Մանուկի դաստիարակութեան մեր մօտեցումը անհրաժեշտ է որ դառնայ համապարփակ: Նեղ հայեցակէտով, տոկմադիք ոգիով եւ ժամանակավրէպ մեթոտներով կատարուող դաստիարակութիւնը կրնայ հակառակ արդիւնքը տալ: Պէտք է գիտնանք հանգրուանային մօտեցումով ու յառաջատուական ընթացքով ի՞նչ փոխանցել մանուկին եւ ի՞նչ բանէ հեռու պահել զինք թէ՛ ընտանիքին, թէ՛ դպրոցին եւ թէ՛ Կիրակնօրեայ վարժարանին մէջ: Պէտք է նաեւ գիտնանք ինչպէ՞ս դաստիարակել մանուկը՝ դիմելով այնպիսի միջոցներու, որոնք համահունչ են կեանքի ներկայ պայմաններուն ու մտահոգութիւններուն ու նաեւ՝ գրաւիչ եւ ազդու: Այս ծիրէն ներս արդի չափանիշներու ու մերօրեայ կարիքներու համապատասխանող մանկական գրականութեան մշակումը, լսողատեսողական կարելիութիւններու ճիշդ օգտագործումը, մանուկները հետաքրքրող հրապուրիչ ծրագիրներու պատրաստութիւնը, մանուկներու յատուկ հաւաքներու կազմակերպումը եւ այլ գրաւիչ նախաձեռնութիւններ կրնան մեծապէս օգտակար հանդիսանալ մանուկներու դաստիարակութեան աշխատանքներուն մէջ:

www.sourphagop.org-ը 10 տարեկան

Մեր այս տարուան դպրոցական տարեշրջանի ընթացքին մեր կայքէջը տօնեց իր տասնամեակը եւ շարունակեց ծաւալիլ: Հասաւ 130 երկիրներու աւելի քան 2,000 քաղաքները եւ 20,000-է աւելի «Մաշտոցի Արձագանգ» եւ 38,000- է աւելի այլ գրութիւններ բացուեցան: Մեր կայքէջին մեծ արժէքը 99 առ հարիւր արեւմտահայերէնով գրուած ըլլալն ու կամաւոր խմբակի մը անսակարկ

աշխատանքին շնորհիւ գոյութիւն ունենալն է: Ընթացքի մէջ է նախորդ տարուան սկսած մեր կայքէջին նորոգումը նոր տառատեսակով (Sylfaen):

Այս տարի նաեւ, դասագրքերու բաժին մը աւելցուցինք մեր կայքէջին վրայ հոն զետեղելով Կիրակնօրեայ Դպրոցի ուղեցոյցն ու բոլոր դասարաններու գիրքերը, եւ նոյն էջին վրայ նաեւ զետեղեցինք Ազգապատումը իր երեք հատորներով, Սուրբ Պատարագը, Ժամագիրքը, Գրաբար Նոր Կտակարան, եւ Կրօնական Գիտելիքներ:

«Մաշտոցի Արձագանգ»ի 18-ամեակ

Մեր այս դպրոցական տարուան ընթացքին հրատարակեցինք նաեւ մեր ամսաթերթը 18րդ տարին ըլլալով եւ մեր կայքէջին ծաւալումով, ծաւալեցաւ նաեւ մեր ամսաթերթի կարդացողներուն թիւը: «Մաշտոցի Արձագանգ»-ի միջոցաւ, այս տարի եւս արեւմտահայերէնով 164 քրիստոնէական դաստիարակութիւն ջամբող էջեր աւելցուցինք համացանցին վրայ:

Աշակերտութեան թիւ

Հակառակ երեք շարունակական տարիներու թիւի անկումին, անցեալ տարուան թիւի աճը մեզի այս տարուան համար յոյս ներշնչեց: Սակայն այս տարուան ընթացքին այդ յոյսերը ի դերեւ ելան : Մեր արձանագրուած աշակերտներուն թիւը եղաւ 38 իսկ միջին ներկայութիւնը 26: Պետք է սակայն յիշել թէ այս տարի մենք ունինք 6 նախակրթարանի շրջանաւարտներ, որոնց ներկայութիւնը պիտի աշխուժացնէ մեր Երկրորդականը յաջորդող տարիներու ընթացքին:

Աստուծոյ կամքով՝ մեր 32րդ տարեշրջանը կը սկսինք Սեպտեմբեր 11, 2011-ին: Մինչ այդ, բարի արձակուրդ կը մաղթենք ձեզի:

Տնօրէնութիւն եւ Ուսուցչական Կազմ

ՀԱԿԻՐՃ ՏԵՂԵԿՈՒԹԻՒՆՆԵՐ
2010-2011 ՏԱՐԵՇՐՋԱՆԻ ՄԱՍԻՆ

Հայաստանի Առաքելական Սուրբ Յակոբ Առաջնորդանիստ Մայր Եկեղեցւոյ Կիրակնօրեայ Դպրոցը կը վայելէ եկեղեցւոյ հովանաւորութիւնը:

31-ամեակ Կիրակնօրեայ Դպրոցին

2010-2011 տարեշրջանը 31-րդ տարեշրջանն էր: Կիրակնօրեայ Դպրոցը սկսաւ իր գործունէութիւնը Խաչվերացի Կիրակին՝ 14 Սեպտեմբեր 1980-ին եւ յաջորդական 31-րդ տարեշրջանը բոլորեց այս տարի: Իւրաքանչիւր տարեշրջան կը սկսի Խաչվերացի Կիրակին եւ կը տեւէ մինչեւ Մայիսի վերջը: ղասաւանդութիւնները տեղի կ'ունենան ամէն Կիրակի օրերը 10:30-1:00: Այս տարի Դպրոցը ունեցաւ մանկապարտէզի 3 եւ նախակրթարանի 6 դասարաններ ինչպէս նաեւ երկրորդականի դասարան մը:

18-ամեակ «Մաշտոցի Արձագանգ» ին

Մեր 2010-11 տարեշրջանի ընթացքին նաեւ հրատարակեցինք, 18րդ տարին ըլլալով՝ մեր պարբերաթերթը, «Մաշտոցի Արձագանգ»ը ամսական դրութեամբ: «Մաշտոցի Արձագանգ»ը կը տպուի եւ PDF ձեւով կը կարդացուի աշխարհի 5 ցամաքամասերուն վրայ www.sourphagop.org/mashdots էջին վրայէն:

10-ամեակ www.sourphagop.org-ին

10 Դեկտեմբեր 2000-ին, Սուրբ Յակոբի տօնին օրը, դպրոցը ունեցաւ իր կայքէջը՝ www.sourphagop.org-ը: Մեր կայքէջը ունի հետեւեալ բաժինները:

Ճաշու Աւետարան, Տօներ, Բառարան, Եկեղեցական բառարան, Պարբերաթերթ, Կապեր, Կարծիքդ, խաղեր, Զարգացման մրցում, Church Timeline, Daily Bible:

Այս տարի նաեւ, դասագրքերու բաժին մը աւելցուցինք մեր կայքէջին վրայ հոն գետեղելով Կիրակնօրեայ Դպրոցի ուղեցոյցն ու բոլոր դասարաններու գիրքերը, ինչպէս նաեւ Ազգապատումը իր երեք հատորներով, Սուրբ Պատարագը, Ժամագիրքը, Գրաբար Նոր Կտակարան, եւ Կրօնական Գիտելիքներ:

ԿԱԶՄ

Կիրակնօրեայ Դպրոցի 2010-11 տարեշրջանի իրենց կամաւոր մասնակցութիւնը բերին հետեւեալ դաստիարակները ներքեւ յիշուած կարգերուն համար:

Թամար Գիզիրեան՝	Մանկապարտեզի Ա. և Բ. Կարգերուն
Յասմիկ Նաճարեան՝	Մանկապարտեզի Գ., Նախակրթարանի Ա. և Բ.
Յասմիկ Գանաճեան՝	Նախակրթարանի Գ. Դ. Ե. և Զ.
Շողիկ Նաճարեան՝	Մասնաւոր Յայտագիրներու պատասխանատու
Թորոս Պապիկեան՝	Երկրորդականի պատասխանատու, Տնօրէն

Կազմը գումարեց ժողովներ, որոնց ընթացքին արծարծուեցան ծրագրային, կարգապահական, արտադասարանային աշխատանքներ եւ այլ նիւթեր:

ԱՇԱԿԵՐՏԱԿԱՆ ՎԻՃԱԿ

2010-11 տարեշրջանին արձանագրուած աշակերտութեան թիւը 38ն էր, իսկ շաբաթական ներկայութիւնն էր 26 բաժնուած 3 խումբերու:

ԴՊՐՈՑԻ ԱՌՕՐԵԱՆ

2010-11 տարեշրջանին Կիրակնօրեայ Դպրոցի առօրեան ընթացաւ Հայաստանեայց Եկեղեցոյ Կիրակնօրեայ Դպրոցներու դասաւանդական հիմնական կառուցուածքին համաձայն՝ լսարանային եւ դասարանային բաժանումներով, ուր դասաւանդուեցան Ս. Գրային, ծիսական, բարոյագիտական եւ գործնական ծանօթութիւններ, գիտելիքներ եւ աղօթքներ:

Լսարանային բաժին

Տերունական աղօթքի, մաղթանքներու եւ Կիրակնօրեայ Մաղթերգէն ետք, աշակերտները բաժնուեցան 3 խումբերու:

Մանկապարտեզի Ա. Բ. Գ. եւ Նախակրթարանի Ա. Բ. Դասարանները
Նախակրթարանի Գ. Դ. Ե. և Զ. Դասարաններ
Երկրորդական

Պահը ընթացաւ հետեւեալ ձեւով.

Ոսկեղէն համարներու կամ Սաղմոսներու ուսուցում
Բարոյալից պատմուածքներու պատմութիւն
Կրօնական երգերու եւ շարականներու ուսուցում
Ճաշու Աւետարանի ընթերցում եւ մեկնաբանութիւն:

Դասարանային բաժին

Դասաւանդուեցաւ ըստ դասագիրքերու:

ԶԵՌՆԱՐԿՆԵՐ ԵՒ ԱՐՏԱԴԱՍԱՐԱՆԱՅԻՆ ԱՇԽԱՏԱՆՔՆԵՐ ԺԱՄԱՆԱԿԱԳՐԱԿԱՆ ՇԱՐՔՈՎ

12 Սեպտեմբեր 2010 Տարեակիզբ եւ վերամուտ

19 Սեպտեմբեր 2010 Վարժարանի աշակերտութիւնը մասնակցեցաւ Սուրբ Պատարագի խորհուրդին եւ հաղորդուեցաւ

10 Հոկտեմբեր 2010 Թարգմանչաց տօնի յատուկ յայտագիր

2 Յունուար 2010 Ամանորի եւ Սուրբ Ծննդեան զոյգ տօներու հանդիսութիւն, ուր տեղի ունեցաւ աշակերտներուն պատրաստած գեղարուեստական ելոյթը: Հանդիսութիւնը վերջ գտաւ հիւրասիրութեամբ եւ նուէրներու բաշխումով:

9 Յունուար 2011 Կիրակնօրեայ Դպրոցի աշակերտները, մասնակցութեամբ կարգ մը ծնողներու, այցելեցին Oratoire Saint-Joseph-ի թանգարանը, ուր ցուցադրուած էին նաեւ տարբեր երկիրներու մտօրները:

6 Փետրուար 2011 Վարդանանց եւ Բուն Բարեկենդան տօներու յատուկ տօնակատարութեան

Դպրոցը Մեծ Պահքի շրջանին ունեցաւ իր աշակերտական պահքի հետեւեալ ժամանակացոյցը:

Մարտ 7-13	Ծամոն
Մարտ 14-20	Շաքար
Մարտ 21-27	Կազային խմիչքներ
Մարտ 28-Ապրիլ 3	Հեռատեսիլ, համակարգիչ, այլ պաստառով խաղեր
Ապրիլ 4-10	Կոլոհատ, տուրմ
Ապրիլ 11-17	Chips
Ապրիլ 18-23	Հաւկիթ


16 Ապրիլ 2011 Դպրոցի ուսուցչական կազմը եւ աշակերտութեան մեծ մասը մասնակցեցան մեր Եկեղեցւոյ Գործադիր Մարմնի կողմէ կազմակերպուած նախաԾաղկազարդեան ընտանեկան հաւաքոյթին:

17 Ապրիլ 2011 Դպրոցը փակ էր Ծաղկազարդ առիթով


24 Ապրիլ 2011 Սուրբ Զատկուայ եւ Յեղասպանութեան յատուկ նշում:

22 Մայիս 2011 Ամավերջի Հանդէս

Աշակերտական Ներկայութեան Տախտակներ



2010 - 2011 տարեշրջանի իւրաքանչիւր դասարանի արձանագրութիւն եւ միջին ներկայութիւն



2010-2011 տաեշրջանի իւրաքանչիւր Կիրակի Օրուայ ներկայութիւն

ՆԿԱՐՆԵՐ՝ ԿԻՐԱԿՆՈՐԵԱՅԻ 2010-11 ՏԱՐԵՇՐՉԱՆԷՆ

